

REGIONAL NEWS

MZU SILVER JUBILEE

Larsap General (Rtd) Vijay Kumar Singh an thenawm ram Myanmar nena insumdawnna tur Kaladan Multi Modal Transit Transport Project hna thawh mekah India in ama huamchhunga kawngpui a siamfel tawh thu a sawi.

Wawiina Mizoram University Auditorium-a Mizoram University din champhaphak leh Silver Jubilee lawmna hun a hmanpuinaah he thu hi sawiin Larsap chuan India chuan kawngpui siam fel tawh mahse lehlam ram ten an la zawh ve theih loh avanga harsatna a awm thu a sawi a. India chuan hei hi chinfel dan kawng a hmuh mai theih a beisei thu leh harsatna hrang hrang chinfela kawngpui siam zawh a nih chuan danglamna ropui tak a thlen a beisei thu a sawi.

Larsap chuan Mizoram chu khualzin hip nana hmun duhawm ber pawl leh theihna nei sang, sanctuary pawh paruk lai nei a nih thu a sawi a. Heti zat sanctuary nei chung a khualzin hip kawnga Mizoram theihtawp a chhuah lo a nih chuan a hlawhchham dawn tih a sawi.

Larsap chuan Mizoram University in kum 25 a tling chu a lawmpui thu sawiin kum 25 kalta chhunga hmasawnna hrang hrang a hmuh chu thil chhinchhiahtlak tak a nih thu a sawi a. NAAC A grade a neih te leh NIRF top 100-a a tling leh India today ranking-a top 30 a ni thei chu lawmawm a tih thu a sawi a. Zirna mai bakah Mizoram University chu zirna in mawi leh chhelvel ram ngaw nei tha tak a ni leh zirna ina intihduhdahna, ragging awm miah lo a zirlai ten zirna an kalpui thei chu lawmawm a tih thu a sawi a ni.

MZU Vice Chancellor Prof. Dibakar Chandra Deka pawhin thu sawiin kum 24 chhungin Mizoram University chuan higher education-ah mite hriat nasa takin a hlawh hman a ni a ti a. India ram state dangte mai bakah ram dang atangin zirlai tam tak an neih thu sawiin tunah hian zirna huanga School of Law, Physical Education leh Sports Education lam hawng thar turin hma an la mek tih a sawi bawk a ni.

Wawiina hun hmanah hian Pahalgam-a mi firfiakten khualzin mi tam tak an tihlum leh Pope Francis sun nan ngawi renga ding turin Larsap in a ngen angin mipuite an ding a ni.

<><><>

WORLD MALARIA DAY

India ramah mi sang khat zel atanga malaria vei hmuhchhuah zat atanga chhutin Mizoram chu Malaria vei tamna ber state a ni.

National Health Mission hnuaia National Vector Borne Disease Control Programme chuan wawiin khan Dawrpui Multipurpose centre-ah khawvel pum huapa sikserh natna do letna ni, World Malaria Day an hmang a, he hunah hian Mizoramah Malaria natna a la hlur thu leh, tun dinhmuna India ramah mi sang khat zel atanga malaria vei hmuhchhuah zat (Annual Parasite Incidence-API) atanga chhutin Mizoram chuan Malaria tamna ber state nihna a la hauh chhonzawm mek thu leh, Malaria dona kawnga tan lak a tul thute thawktute chuan an sawi a. Mizoram-ah

hian kum 2023 khan Malaria vei mi 18005 awmin, mi 13 in an nunna an chan a. Nikum, 2024 ah khan Malaria natna vei mi 16899 an awm a, nunna chan mi 7 an awm bawk a ni. Kumin 2025 Jan-March thla chhungin Malaria hmuhchhuah tawh zat hi 866 niin nunna chan an awm lo thung.

Vawiin hun hmanah hian Health Minister Pi Lalrinpuii chuan Mizoram chu ram puma Malaria vei zingah a sang ber a la nih avangin kum 2027-a Malaria umbo vek hman turin kum 2 chauh a awm tawh avangin uar lehzuala theihtawp chhuah a tul tih a sawi a. Mizoramah chuan Mamit, Siaha, Lawngtlai leh Lunglei district te chu Mizorama Malaria kai tam berte an nih avangin heng district hrang hranga Village council te chu theihtawp chhuahpui turin a sawm a, thosilen damdawia chiah zar kawngah te, thisen test leh damdawi ei kawngah te mipui fuih turin a ngen a ni.

Vawiina hun hmanah hian Mizoram Malaria dinhmun tlangpui a sawi a ni a, World Malaria Day pual hian Mizorama District zawng zawngah Malaria dona atana hmalakna hrang hrang kalpui niin; khawtlang mipui leh Pawl hrang hrang te nen Malaria chungchang inzirtira hun te neih anih bakah Source Reduction Drive (Thosi pian theihna tui tling tihbo hnatlang) te, Lo/Huan neitu te Malaria laka an lo him theihnan a hmalakna chi hrang hrang te bakah school zirlai te nen hun hman ho a ni bawk.

<><><>

EDU FAIR

Zirlaite tana zir chhunzawm zelnat tur chungchang hrilhfiat leh buaipuina, Edu Fair chu vawiin khan Millenium Centre Rooftop ah buatsaih a ni a, naktuk inrinni thlang a awm ang.

Edu Fair buatsaihtu zinga mi, Sape Events And Media Pvt Director - Sanjay chuan Mizo zirlaiten ram chung hmun hrang hranga zirna leh zir tur awm an lo hriat zau zawk nan leh an hriatthiam theih nan Edu Fair chu buatsaih a ni a ti a, Pawl 12 zirlaite tan zirna sang zawk hriatchian tuma hmun hla tak pan ngai lovin, Aizawlah ngei ram chung hmun hrang hranga University chungchang fiat leh chiang taka an zawhfiat theihna a nih avangin zirlaite chu Edu fair-ah hian kal theuh turin a sawm a ni.

Edu Fair-ah hian state hrang hranga private university leh central sorkar hnuaia zirna in 26 te an in phochhuak a, an zingah hian Mizoten an la hmelhriat vak loh, Indian army, Indian Airforce leh Indian maritime University te pawh telin Mizo thalaite tan sipaia luh theihna te an sawifiat a, Mizo thalai tam zawkte chuan sipaia luh dan hi an hriat loh avangin Mizoram tana vacancy awm te chu midangin an luah sak fo tih an sawi a ni.

<><><>

HSLC RESULT

Mizoram Board of School Education chuan HSLC Result chu karleh thawhlelni April ni 29-ah a tichhuak dawn.

MBSE chuan nimin khan hriattirna tichhuakin, kum 2025 HSLC Examination result chu karleh thawhlelni April ni 29 chhun dar 12 ah tihchhuah tum a ni a ti a, Result hi MBSE Office Chaltlangah leh website - www.mbse.edu.in leh www.mbseonline.com-ah te en theih a nih dawn bakah a mamawh tan result bu lei theihin a awm dawn tih mipuite a hriattir a ni.

<><><>

LS MP

Lok Sabha MP Pu Richard Vanlalmangaiha chuan nimin khan Union Minister of State for Defence Pu Sanjay Seth chu a Pisa ah kawmin Mizoram tana thil tangkai tur tam tak an sawi dun.

He an inkawmnaah hian Pu Richard Vanlalmangaiha a chuan Mizoram Chief Minister lo ngen tawhna bawhzuiin Mizoram a Territorial Army Unit din thuai a nih theih nana hmalakpui turin Union Minister hi a ngen a. MP ngenna hi Union Minister chuan lo ngaipawimawhin rang taka an ngaihtuah tur thu a lo hrilh bawk a ni.

Lok Sabha MP chuan Mizoram chu International Border a awm a nih ang in Mizo mipui ten Indian Defence System kan hriat chian a tul hle thu sawiin hemi kawngah hian Mizoram Journalist Association (MJA) te chu India ram hmun hrang hrang a Defence Study Tour an neih theih nan a hmalakpui turin Union Minister hi a sawm a, Union Minister hian hma a lakpui ngei tur thuin a lo chhang a, Union Minister of State for Defence Shri Sanjay Seth chuan Pu Richard Vanlalmangaiha chu Indian Defence Committee sang leh pawimawh tak tak pahnih Standing Committee on Defence leh Consultative Committee on Defence a member a nih avanga a lawmpui thu leh Indian Defence tana theih tawp chhuaha a hun leh ngaihtuahna te seng turin a ngen bawk a ni.

<><><>